

Gjykata Komunale e Gllgovcit, si gjykatë civile e shkallës së parë me gjyqtaren e EULEX-it Johanna Schokkenbroek, në kontestin ndërmjet paditësit Qamil Dragaj nga Gllgovci, i përfaqësuar nga avokati Feriz Gervalla dhe të paditurës, Komuna e Gllgovcit, e përfaqësuar nga Avokati Publik Komunal, Hakif Hasi në rastin për kompenzimin e dëmit, sjellë këtë

A k t g j y k i m

1. Kërkesëpadia e paditësit Qamil Dragaj nga Gllgovci për kompenzimin e dyqanit të rrënuar APROVOHET PJESËRISHT dhe e paditura Komuna e Gllgovcit obligohet të kompenzojë dëmin material shkaktuar paditësit gjatë rrënimit të dyqanit të tij me 1 dhe 2 Mars 2005 (dyqani në vendin e quajtur "Ashanajka" në Gllgovc, me numër kadastral 763, lokacioni nr. 45, me sipërfaqe 48 m², këtej e tutje i referuar si dyqani) në shumë prej 7.200 Euro, bashkë me kamatën e cila aplikohet sipas dispozitave bankare për kursime për një periudhë mbi një vit, duke u llogaritur nga data 15 Prill 2005, që kur padia ishte ngritur e deri në pagesën e fundit.
2. Kërkesëpadia e paditësit për kompenzimin e inventarit të shkatërruar në dyqan APROVOHET PJESËRISHT dhe e paditura obligohet të kompenzojë dëmet materiale të shkaktuara inventarit të paditësit gjatë rrënimit të dyqanit të tij me 1 dhe 2 Mars 2005 në shumë prej 1500 Euro, bashkë me kamatën që aplikohet sipas dispozitave bankare për kursime për një periudhë mbi një vit, duke u llogaritur nga data 15 Prill 2005, që kur padia ishte ngritur e deri në pagesën e fundit.
3. Kërkesëpadia e paditësit për kompenzimin e fitimit të humbur REFUZOHET si e pabazuar.
4. Kërkesëpadia e paditësit për kompenzimin e dëmeve jomateriale APROVOHET PJESËRISHT dhe e paditura obligohet të kompenzojë dëmin jomaterial të shkaktuar paditësit në shumë prej 250 Euro. Kërkesa për kamatë REFUZOHET.
5. Kërkesëpadia për caktimin e një ngastre të ngjashme për lokal afarist REFUZOHET si e pabazuar.

E paditura, Komuna e Gllgovcit urdhërohet t'ia paguajë paditësit, Qamil Dragaj shumën prej pikës 1,2 dhe 4 më lartë, shumën prej 1004 Euro për mbulimin e shpenzimeve procedurale, si dhe shumën prej 50 Euro në emër të taksës gjyqësore në afat prej 15 ditësh pasi ky aktgjykim të ketë marrë formën e prerë.

Arsyetim:

1. Rrethanat e përgjithshme

Në vitin 1992 Komuna e Gllgovcit ua ofroi individëve mundësinë që të marrin ngastra të tokës për ndërtimin e lokaleve afariste në rrugën kryesore të Gllgovcit. Përafërsisht 60 ngastra iu ishin ndarë individëve në vitet që pasojnë. Disa ngastra ishin lëshuar për shfrytëzim të përhershëm. Ngastra të tjera ishin lëshuar për shfrytëzim të përkohshëm. Ngastrat ishin lëshuar me detyrimin që të ndërtoheshin lokale afariste. Kërkohej leja paraprake e Komunës së Gllgovcit për ndërtim. Lokalet ishin ndërtuar në shumicën e ngastrave të lëshuara dhe iu ishin dhënë lejet e punës pas inspektimit të ndërtimit nga Komuna.

Pas luftës (në shtator 1999) Komuna e Gllgovcit vendosi që t'i lirojë ngastrat dhe i urdhëroi të gjithë pronarët individualë të lokaleve që t'i rrënojnë lokalet e tyre dhe ta lirojnë ngastrën.

Procedurat administrative lidhur me këtë vendim të Komunës së Gllgovcit zgjatën deri në vitin 2005, kur Gjykata Supreme në një kontest administrativ më 21 mars 2005 vendosi t'i shfuqizojë vendimet administrative dhe ta kthejë çështjen në procedurë administrative.

Sidoqoftë, para se të bëhej vendimi i Gjykatës Supreme, Komuna më 15 janar 2005 lëshoi një vendim për lirimin e ngastrave.

Më 1 dhe 2 mars 2005 Komuna e of Gllgovcit i rrënoi të gjitha lokalet e përfshira në çështje dhe i liroi të gjitha ngastrat.

Vendimet e mëparshme të Komunës së Gllgovcit për rrënimin e këtyre lokaleve ishin suspenduar nga Administratori Komunal i UNMIK-ut (1999) si dhe nga Përfaqësuesi Special i Sekretarit të Përgjithshëm të Kombeve të Bashkuara në Kosovë (7 maj 2001) apo ishin ndërprerë për shkak të një kërkesë të Ombudspersonit në Kosovë.

Procedurat administrative lidhur me urdhërat e Komunës së Gllgovcit për heqjen e lokaleve nuk u vazhduan pas rrënimit në mars të vitit 2005. Në atë kohë, pasi që tanimë lokalet ishin rrënuar, nuk ekzistonte gjithashtu objekt për ndonjë procedurë administrative.

Pas rrënimit në mars të vitit 2005 shumë pronarë të lokaleve të rrënuara paraqitën ankesë para Gjykatës Komonale të Gllgovcit kundër Komunës së Gllgovcit për kompensim.

Pasuan procedurat ligjore (ankesat dhe rigjykimet) lidhur me paditë dhe ato zgjatën për shumë vite.

Sipas kërkesës së 19 paditësve / pronarëve të dyqaneve EULEX-i vendosi që t'i merr këto 19 raste (padi për kompensim) me anë të vendimit të datës 8 dhjetor 2009 (17) dhe atë të datës 25 qershor 2010 (2).

Së paku dy pronarë të lokaleve me kontratë për shfrytëzim të përhershëm të ngastrave të tyre kanë marrë kompensim si rezultat i një vendimi të Gjykatës Komunale të Glllogovcit (në shkallë të dytë të konfirmuar nga Gjykata e Qarkut të Prishtinës).

2. Padia

Qamil Dragaj kërkoi:

- 1-Kompensim për lokalin afarist të rrënuar në një shumë prej 45.600 €, (950 € për metër katror, në bazë të sipërfaqes së përgjithshme të dyqanit, 48 m2 ku përfshihet edhe hapësira nën kulm);
- 2 – Kompensim për inventarin e humbur në një shumë prej 4.260 €;
- 3 – Kompensim për fitimin e humbur në një shumë prej 600 €, - në muaj prej 1 marsit 2005;
- 4- Kompensim për vuajtje morale/ dëme jomateriale në një shumë prej 7.000 €;
- 5- Caktimi nga ana e të paditurit i një ngastre të ngjashme për lokal afarist;
- 6 – Kamatën e shumave të kërkuara nën 1, 2, 3 dhe 4 të llogaritura në kamatën e depozitit të kursimeve në bankat e Kosovës.

Paditësi e bazon padinë e tij në faktin se Komuna e Glllogovcit e ka shkelur Ligjin mbi Detyrimet (neni 154) me rrënimin e pronës së tij. Paditësi kërkon kompensimin për shpenzime procedurale në një shumë prej 1004, €.

Komuna e Glllogovcit e mban qëndrimin se ajo kishte plotësisht te drejtë që t'i lironte ngastrat (duke e përfshirë edhe rrënimin e dyqaneve) dhe se nuk e kishte shkelur asnjë ligj, pasi që paditësi e kishte zënë ngastrën në mënyrë joligjore. Komuna e Glllogovcit dhe paditësi asnjëherë nuk kishin lidhur kontratë për shfrytëzimin e ngastrës. Rrjedhimisht, nuk ekzistonte kurrëfarë baze ligjore për paditësin në shfrytëzimin e ngastrës. E paditura kërkoi kompensimin për shpenzime procedurale në një shumë prej 611 €.

3. Historia procedurale

Kërkesa është dorëzuar në Gjykatën Komunale në Gllogovc më 15 prill 2005. Më 14 nëntor 2005, Gjykata Komunale në Gllogovc vendosi që ta ndërpresë procedurën në pritje të procedurës administrative pranë Drejtorisë Komunale për Planifikim Urban, ose kur gjykata e konsideron vazhdimin e procedurës si të përshtatshme. (C.nr. 64/05). Më 22 nëntor 2005 paditësi paraqiti ankesë ndaj këtij vendimi. Gjykata e Qarkut në Prishtinë e refuzoi ankesën dhe e konfirmoi vendimin e Gjykatës Komunale të Gllogovcit më 13 korrik 2007 (Ac.nr. 948/2005).

Në këtë rast, Gjykata Komunale në Gllogovc asnjëherë nuk ka lëshuar ndonjë aktgjykim.

Më 25 shtator 2009, paditësi kërkoi nga EULEX-i të marrë përsipër çështjen.

Më 8 dhjetor 2009, EULEX-i ka marrë përsipër çështjen për rigjykim. Më 12 maj 2010, procedura u ndal në mënyrë që të informohet Ministria e Drejtësisë dhe Ministria e Ekonomisë dhe Financave, siç kërkohet nga nenet 67 dhe 68 të Ligjit mbi Menaxhimin e Financave Publike dhe Përgjegjësitë.

Më 2 shkurt 2011, Gjykata Komunale në Gllogovc anuloi vendimin e datës 14 nëntor 2005. Në rigjykim, u mbajt seanca përgatitore dhe shqyrtimi kryesor, ashtu siç është përshkruar në procesverbalin e këtyre seancave.

4. Faktet

Gjykata i referohet provave të administruara ashtu siç janë regjistruar në procesverbalin e shqyrtimeve gjyqësore.

Faktet e mëposhtme lidhur më këtë lëndë janë vërtetuar apo sidoqoftë janë të pakontestuar:

Rreth vitit 1997 Komuna e Gllogovcit ia dha Aferdite Osmanit një ngastër të tokës për shfrytëzim të përkohshëm në vendin e quajtur Ashanajka, parcela kadastrale nr. 763,nr. 45 në Komunën e Gllogovcit me një sipërfaqe prej 24.m2.

Gjykata iu referohet provave të administruara të paraqitura nga palët:

-Vendimi i Komunës së Glllogovcit (Drejtoria e Planifikimit Urban, Strehimit, Infrastrukturës Komunale dhe Pronës) të datës 22 prill 1992 (për Aferdite Osmanin);

-Kontrata e datës 2 korrik 1997 në mes të Komunës së Glllogovcit dhe Aferdite Osmanit;

-Vendimi i Komunës së Glllogovcit, datë 9 korrik 1997 për dhënien e lejes Aferdite Osmanit për ta ndërtuar një lokal afarist;

Aferdite Osmani lidhi një kontratë me paditësin në një datë të panjohur. Kjo kontratë ka të bëjë me shitjen e dyqanit. Kontrata nuk iu është paraqitur gjykatës. Dokumentet kanë humbur gjatë luftës. Nuk ka dokumente të paraqitura nga paditësi për regjistrim apo ndonjë ndryshim të pronësisë (neni 36 Ligji mbi pronën dhe të drejtat sendore).

Më 5 maj 2004 Komuna e Glllogovcit mori vendime me anë të të cilave e anuloi vendimin për ndarjen e ngastrës për Aferdite Osmanin (dhe për disa pronarë të tjerë të dyqanve apo në disa raste për ish pronarët).

Më 1 dhe 2 mars 2005 Komuna e Glllogovcit i rrënoi të gjitha lokalet e përfshira dhe i liroi të gjitha ngastrat. Ky rrënim u bë pa një njoftim paraprak për paditësin (as për Aferdite Osmanin dhe as për pronarët e tjerë të dyqaneve). Së paku dy pronarë të lokaleve me kontratë për shfrytëzim të përhershëm të ngastrave të tyre kanë marrë kompenzim si rezultat i një vendimi të Gjykatës Komunale të Glllogovcit të datës 16 mars 2007 (C.nr 78/05) dhe 21 Shtator 2007 (C.nr 95/05). Komuna e Glllogovcit ka paraqitur një ankesë ndaj të dyja vendimeve. Gjykata e Qarkut të Prishtinës i konfirmoi këto vendime me anë të vendimeve të datës 30 prill 2008 (AC.nr 445/2007) dhe 15 qershor 2009 (AC.937/2007). Në rastin e parë të theksuar më lart pronari i dyqanit mori një kompenzim prej 282 € për m² dhe pronari tjetër i dyqanit mori 540,82 € për m².

5. Çështjet procedurale të ngritura nga palët

Parashtresat:

A) Moskompetenca e gjykatës

Në një parashtresë Komuna e Glllogovcit e kundërshtoi kompetencën e Gjykatës dhe kërkoi nga Gjykata që ta hedhë poshtë padinë në bazë të moskompetencës së Gjykatës. Sipas Komunës së Glllogovcit, autoriteti kompetent për kontestet administrative është Gjykata Supreme.

Gjykata është e mendimit se ky është një kontest rreth përgjegjësisë për dëmet. Këto dëme janë rezultat i një veprimi të Komunës së Glllogovcit që ka ndodhur në Glllogovc.

Në bazë të nenit 47 të Ligjit mbi Procedurën Kontestimore, gjykata kompetente është Gjykata në territorin e së cilës ka ndodhur dëmi.

Gjykata e hodhi poshtë kundërshtimin e Komunës së Glllogovcit si të pathemeltë. Gjykata iu referohet një vendimi të ngjashëm të parashtruar nga Komuna e Glllogovit në një fazë të mëhershme të këtij kontesti.

B) Moskompetenca e EULEX-it

Në një parshtrësë Komuna e Glllogovcit e kundërshtoi kompetencën e EULEX-it, pasi që ky kontest nuk ka të bëjë me pronën.

Kjo Gjykatë (kjo gjyqtare e EULEX-it) është e mendimit se ky kontest është çështje civile që ka të bëjë me pronën, ashtu siç shprehet në nenin 5.1 c. të Ligjit mbi Kompetencat, Përzgjedhjen e Lëndëve dhe Caktimin e Lëndëve të Gjyqtarëve dhe Prokurorëve të EULEX-it në Kosovë.

C) Kundërshtimi lidhur me Nenin 394 të Ligjit mbi Procedurën Kontestimore

Në një parshtrësë tjetër Komuna e Glllogovcit bëri një vërejtje lidhur me rregullsinë e procedurave, duke pretenduar që është dashur që Komunës së Glllogovcit t'iu ishte dhënë mundësia që të parashtrojë një përgjigje me shkrim në padi, në pajtim me nenin 394 të Ligjit mbi Procedurën Kontestimore (LPK). Gjykata nuk ka kërkuar nga Komuna e Glllogovcit që të paraqesë përgjigje në padi, për shkak të faktit se neni 394 i LPK-s kërkon nga Gjykata që të kërkojë nga pala e paditur përgjigje në padi, "brenda 15 ditësh pasi që gjykata ta ketë pranuar padinë". Në rastin konkret, është e qartë se kjo nuk ishte e realizueshme, për shkak të faktit se padia ishte dorëzuar në Gjykatë në vitin 2005, kur kjo dispozitë procedurale që kërkonte përgjigje në padi nuk ishte në fuqi. Përveç kësaj, pasi që rasti konkret ishte rigjykim dhe palët tanimë i kishin dhënë qëndrimet e tyre në procedurat e mëhershme dhe nga këto qëndrime ishte e pamundur që të veprohej në pajtim me nenet 398 apo 399 të LPK-s, Gjykata nuk pa ndonjë përfitim substancial që të kërkonte përgjigje në padi nga pala e paditur 5 vite pas dorëzimit të padisë dhe pas shqyrtimeve në dy instanca. Prandaj, kjo vërejtje e palës së paditur nuk është marrë parasysh.

D) Kundërshtimi lidhur me mungesën e legjitimitetit të paditësit

Në fjalën përfundimtare, pala e paditur pati vërejtje lidhur me legjitimitetin aktiv të paditësit, duke theksuar se paditësi nuk është pronar i pronës dhe se prona nuk iu ishte dhënë atij në shfrytëzim, dhe prandaj paditësi nuk ka legjitimitet për të qenë palë në këtë lëndë. Sidoqoftë, objekt i shqyrtimit nuk është raporti në mes të palëve dhe as të drejtat pronësore të cilësdo palë, por vetëm lidhur me detyrimet që kanë të bëjnë lidhur me kompensimin e dëmeve që iu shkaktuan dyqanit, i cili pa asnjë dyshim ishte nën posedim të paditësit.

Gjithashtu, është e pakontestueshme se paditësi ka paguar për shfrytëzimin e dyqanit, gjë që në mënyrë plotësuese e legjitimon paditësin si palë me interes juridik, pra si palë me legjitimitet aktiv, ashtu siç kërkohet me nenin 2.4 të Ligjit mbi Procedurën Kontestimore.

6.Vlerësimet ligjore sipas fakteve

Kërkesa 1 dhe 2

Kjo padi ka të bëjë lidhur me kompenzimin e pronës së dëmtuar (shkatërruar), dyqanit dhe inventarit të tij.

Nga deklaratat e bëra në këtë seancë, është e qartë se paditësi kishte për qëllim që të bëhej pronar i lokalit (dyqanit) të ndërtuar në atë ngastër. Sidoqoftë, ai asnjëherë nuk i ka plotësuar kushtet ligjore që të bëhej pronar i dyqanit (neni 36 Ligji mbi Pronësinë dhe të Drejtat Sendore). Sidoqoftë, është e pakontestueshme se ai ishte pronar i materialit, me të cilin ishte ndërtuar dyqani dhe i inventarit të tij.

Në këtë kërkesë janë të përfshira çështje të pronës. Lidhur me (mbrojtjen e) të drejtave të pronës Gjykata i referohet legjislacionit të mëposhtëm:

Në atë kohë (1 dhe 2 mars 2005) ishte në fuqi Rregullorja mbi Vetëqeverisjen e Komunave në Kosovë (Rregullorja e UNMIK-ut 2000/ 45).

Kjo rregullore përmban një kapitull " Ekzekutimi i Çështjeve Komunale"(kapitulli 5 Neni 33).

Ky kapitull përmban këtë dispozitë të cituar:

"Parimet e Ligjshmërisë

Ligji dhe drejtësia e obligojnë administratën e komunës që të zbatojë në veçanti të drejtat dhe liritë e njeriut sipas Konventës Evropiane për Mbrojtjen e të Drejtave dhe Lirive Themelore të Njeriut."

Protokolli nr. 1 i Konventës për Mbrojtjen e të Drejtave të Njeriut dhe Lirive Themelore thotë, siç vijon:

Neni 1

Mbrojtja e pronës

Çdo person fizik ose juridik ka të drejtën e gëzimit paqësor të pasurisë e tij. Askush nuk mund të privohet nga prona e tij, përveçse për arsye të interesit publik dhe në kushtet e parashikuara nga ligji dhe nga parimet e përgjithshme të së drejtës ndërkombëtare.

Megjithatë, dispozitat e mëparshme nuk çenojnë të drejtën e Shteteve për të zbatuar ligje, që ato i çmojnë të nevojshme për të rregulluar përdorimin e pasurive në përputhje me interesin e përgjithshëm ose për të siguruar pagimin e taksave ose të kontributeve ose të gjobave të tjera.

Gjatë ushtrimit të këtij pushteti që ka për qëllim interesin e përgjithshëm të cituar më lart, shteti apo çfarëdo organi administrativ, duke qenë pjesë e shtetit (siç është në këtë rast Komuna e Gllgovcit), është i obliguar që t'i bindet ligjit dhe drejtësisë. (neni 33 i Rregullores mbi Vetqeverisjen e Komunave në Kosovë/ Rregullorja e UNMIK-ut 2000/ 45).

Komuna e Gllgovcit ishte e autorizuar që të merrte masa në mënyrë që ta pastronte ngastrën e tokës (dhe ta përfundonte zënien ilegale) të shfrytëzuar nga paditësi. Sidoqoftë, me ushtrimin e kësaj të drejte Komuna e Gllgovcit është dashur që t'i merrte parasysh edhe interesat (investimet dhe gjërat) e paditësit.

Gjykata konkludon se Komuna e Gllgovcit gjatë ushtrimit të pushtetit të saj fare nuk i ka marrë parasysh interesat e paditësit.

Së pari Komuna e Gllgovcit nuk e shpalli një afat para të cilit duhej të liroheshin ngastrat dhe nuk e shpalli datën se kur vet Komuna e Gllgovcit do t'a lironte ngastrën (shkatërronte lokalin). Konsiderohet nga Gjykata se në këtë rast të veçantë nuk ka pasur urgjencë që të ekzekutohet vendimi për lirim të ngastrës para një dite të caktuar (sidoqoftë Komuna e Gllgovcit nuk ka zbuluar ndonjë rrethanë të kësaj natyre dhe gjykata nuk ka mundur të konkludojë ndonjë prej rrethanave të tilla nga dokumentet e parashtruara).

Parimet e përgjithshme të drejtësisë nënkuptojnë gjithashtu që organi administrativ, gjatë ekzekutimit të pushtetit për lirim të ngastrës, duhet të bëjë përpjekje për zvogëlimin e dëmit të mundshëm ndaj palës së tretë (në këtë rast paditësit si investues). Në këtë rast të veçantë Komuna e Gllgovcit është dashur ta njoftonte paditësin me kohë lidhur me afatin e fundit se kur duhej të lirohej ngastra dhe është dashur ta paralajmëronte atë se Komuna e Gllgovcit do t'i lirojë vet ngastrat, nëse ata vet nuk i lirojnë ato (me shkatërrimin e të gjitha lokaleve të mbetura).

Gjatë seancës kryesore saktësisht u kuptua se Komuna e Gllgovcit nuk ka shpallur një (ndonjë) afat kohor para se të ndodhte rrënimi i dyqaneve më 1 dhe 2 mars 2005. Është e pakontestueshme se rrënimi më 1 dhe 2 mars 2005 ishte i papritur për pronarët e dyqaneve (duke e përfshirë edhe paditësin). Nga dokumentet e parashtruara nga palët konstatohet se Komuna e Gllgovcit nuk ka dërguar ndonjë njoftim (me anë të konkluzioneve, letrave,

vendimeve, etj.) pas vitit 2002. Gjykata konstatoi nga raporti i dërguar nga Ombudspersoni, se dia pronarë të dyqaneve ishin të njoftuar lidhur me qëllimin e Komunës së Glllogovcit për lirim (që do të thotë shaktërrimin) në të ardhmen e afërt. Sidoqoftë, Gjykata konstaton se Komuna e Glllogovcit nuk e ka informuar paditësin në kohë dhe mënyrë të duhur lidhur me ditën që ishte e caktuar për rrënim. Me rezultatin se paditësit iu ishte mohuar mundësia për largimin e gjërave të tij.

Prandaj, shkatërrimi i kryer më 1 dhe 2 mars 2005 nga ana e Komunës së Glllogovcit është një shkelje e nenit 16 të Ligjit mbi Marrëdhëniet e Detyrimeve në lidhje me paditësin. Në bazë të nenit 154, 155 dhe 156 të Ligjit mbi Marrëdhëniet e Detyrimeve Komuna e Glllogovcit është e obliguar që t'ia kompenzojë paditësit investimin e humbur (inventarin dhe materialin ndërtimor).

Dëmi dhe kompenzimi

Rrënimi ndodhi më 1 dhe 2 mars 2005. Do të thotë më shumë se para gjashtë vitesh. Nuk ka mbetur asgjë nga dyqanet e mëparshme. Tani është e pamundur që të vërtetohet shuma e saktë e dëmit të shkaktuar me rrënimin. E njëjta vlen edhe për vlerën e inventarit. Kështu që eksperti nuk do të mund të ndihmonte në vërtetimin e dëmit. Humbja e provave lidhur me dëmin është një rezultat i drejtpërdrejtë nga rrënimi i përgjithshëm i papritur i dyqaneve. Këto rrethana janë tërësisht në rrezik dhe në shpenzime të Komunës së Glllogovcit. Lartësia e dëmit është e bazuar në parimet e përgjithshme të drejtësisë dhe përgjegjshmërisë. Shuma e kompenzimit do të bazohet në m² kati përdhësë (200 €) dhe m² për nënkulm (100 €). Gjykata aprovon padinë për dyqanin e shkatërruar deri në shumën 7. 200 €.

Për këtë, gjykata ka llogaritur shpënzimet e përafërta lidhur me ndërtimin në kohën kur u bë ndërtimi dhe jo vlerën komerciale të dyqanit, sepse shfrytëzuesi nuk ka pasur të drejtë që ta shesë lokalin.

Kompenzimi për inventarin e humbur nuk është specifikuar nga ana e paditësit, edhe pse e kërkuar saktësisht nga Gjykata (aktvendimi i datës 27 gusht 2010). Pasi që Komuna e Glllogovcit nuk e ka kontestuar se inventari ishte lënë në dyqan, Gjykata do ta pranojë se inventari është humbur apo shkatërruar si rezultat i veprimt të shkatërrimit nga ana e Komunës, prej të cilit paditësit iu shkaktuan dëme materiale. Gjykata do ta aprovojë padinë për inventarin e humbur derin në shumën prej 1.500.€. Pasi që nuk kishte ndonjë specifikacion lidhur me vlerën reale të inventarit, kjo ishte caktuar si një shumë e përafërt e një inventari të arsyeshëm i një dyqani të asaj madhësie.

Kërkesa 3 (kompenzimi për fitimin e humbur)

Komuna e Glllogovcit dhe paditësi asnjëherë nuk kanë lidhur ndonjë marrëdhënie në të kaluarën lidhur me ngastrën e tokës për të cilën bëhet fjalë dhe lidhur me të drejtën për të ndërtuar një dyqan (në ngastër). Rrjedhimisht, nuk ekzistonte kurrëfarë baze ligjore që paditësi ta shfrytëzonte ngastrën. Rrjedhimisht, Komuna e Glllogovcit ishte e autorizuar që të merrte masa që ta bënte paditësin që ta lironte ngastrën. Prandaj, kjo Gjykatë e refuzoi këtë kërkesë si të pabazuar.

Kërkesa 4 (kompenzimi për vuajtjet shpirtërore/ dëmet jomateriale)

Është e qartë se kjo ngjarje i shkakton paditësit vuajtje shpirtërore/ dëm jomaterial. Për shumicën e pronarëve të dyqaneve kjo do të thotë humbje e burimit të të hyrave të tyre për jetesë. Nga natyra e saj ky lloj dëmi nuk mund të kompenzohet me anë të parave dhe dëmi as nuk mund të caktohet saktësisht. Prandaj, gjykata e aprovon një kompenzim simbolik në një shumë prej 250 €. Nuk ekziston bazë ligjore që të aprovohet kamata e kërkuar pasi që shumica e kompenzimit është llogaritur nga dita e sotme.

Kërkesa 5 (caktimi i një ngastre tjetër të ngjashme për lokal afarist)

Kjo kërkesë refuzohet si e pabazuar, pasi që Komuna e Glllogovcit në të kaluarën asnjëherë nuk kishte lidhur ndonjë marrëdhënie me paditësin lidhur me ngastrën, për të cilën bëhet fjalë.

7 Shpenzimet procedurale

Edhe pse padia ishte aprovuar vetëm pjesërisht, gjykata ka vendosur në pajtim me Nenin 452. 3 të Ligjit mbi Procedurën Kontestimore që pala e paditur do t'i bartë të gjitha shpenzimet procedurale. Kjo ishte vendosur për shkak të faktit se veprimet e palës së paditur sollën deri të kontesti. Ky kontest kishte mundur të shmangej sikur e paditura të kishte treguar vullnet për arritjen e një marrëveshjeje me paditësit për kompenzimin e dëmeve. Pozita e të paditurës si autoritet publik duhet të mirret parasysh si një obligim shtesë për pajtim me qytetarët dhe t'i kushtojë vëmendje të drejtave të tyre pronësore të ligjshme. Gjykata nuk ka vërejtur ndonjë lloj të një vullenti të tillë nga ana e të paditurës. Prandaj, gjykata vendosi që e paditura t'ia paguajë paditësit tërë shumën e shpenzimeve procedurale.

Gjykata Komunale e Gllgovcit,
C.Nr 64/05, data 21 tetor 2011

Gjyqtarja e *EULEX-it*
Johanna Schokkenbroek

8 Këshilla juridike

Palët mund të paraqesin ankesë ndaj këtij aktgjykimi drejtuar Gjykatës së Qarkut të Prishtinës përmes kësaj gjykate, brenda pesëmbëdhjetë (15) ditësh pas pranimit të këtij aktgjykimi.

E përpiluar në anglisht si gjuhë e autorizuar.